

四庫全書

子部

欽定四庫全書

子部

經濟類編卷四十三

詳校官中書臣瞿照

主事臣祁韻士覆勘

總校官知縣臣繆琪

校對官中書臣王嘉增

謄錄監生臣汪存堦

欽定四庫全書

經濟類編卷四十三

明 馮琦馮瑗 撰

禮儀類五

奉使

五十二則

劉向奉使篇 春秋之辭有相反者四既曰大夫無遂
事不得擅生事矣又曰出境可以安社稷利國家者則
專之可也既曰大夫以君命出進退在大夫矣又曰以

君命出聞喪徐行而不反者何也曰此四者各止其科
不轉移也不得擅生事者謂平生常經也專之可者謂
救危除患也進退在大夫者謂將帥用兵也徐行而不
反者謂出使道聞君親之喪也公子子結擅生事春秋
不非以為救莊公危也公子遂擅生事春秋譏之以為
僖公無危事也故君有危而不專救是不忠也君無危
而擅生事是不臣也傳曰詩無通故易無通吉春秋無
通義此之謂也

周簡王八年魯成公來朝使叔孫僑如先聘且告見王
孫說與之語說言於王曰魯叔孫之來也必有異焉其
享覲之幣薄而言諂殆請之也若請之必欲賜也魯執
政唯強故不歡焉而後遣之且其狀方上而銳下宜觸
冒人主其勿賜若貪陵之人來而盈其願是不賞善也
且財不給故聖人之施舍也議之其喜怒取予也亦議
之是以不主寬惠亦不主猛毅主德義而已王曰諾使
私問諸魯請之也王遂不賜禮如行人及魯侯至仲孫

蔑為介王孫說與之語說讓說以語王王厚賄之

叔弓聘于晉報宣子也晉侯使郟勞辭曰寡君使弓來繼舊好固曰女無敢為賓徹命於執事敝邑弘矣敢辱郊使請辭致館辭曰寡君命下臣來繼舊好好合使成臣之祿也敢辱大館叔向曰子叔子知禮哉吾聞之曰忠信禮之器也卑讓禮之宗也辭不忘國忠信也先國後己卑讓也詩曰敬慎威儀以近有德夫子近德矣

晉使解揚如宋使無降楚曰晉師悉起將至矣鄭人囚

而獻諸楚楚子厚賂之使反其言不許三而許之登諸樓車使呼宋人而告之遂致其君命楚子將殺之使與之言曰爾既許不殺而反之何故非我無信爾則棄之速即爾刑對曰臣聞之君能制命為義臣能承命為信信載義而行之為利謀不失利以衛社稷民之主也義無二信信無二命君之賂臣不知命也受命以出有死無實又可賂乎臣之許君以成命也死而成命臣之祿也寡君有信臣下臣獲考死又何求楚子舍之以歸

魯襄公聞亂乘驅自閔門入慶比御公公南楚駮乘使
華寅乘貳車及公宮鴻駟駟乘于公公載寶以出褚
師子申遇公於馬路之衢遂從過齊氏使華寅肉袒執
蓋以當其闕齊氏射公中南楚之背公遂出寅閉郭門
踰而從公公如死烏折朱鉏宵從竇出徒行從公齊侯
使公孫青聘于衛既出聞衛亂使請所聘公曰猶在竟
內則衛君也乃將事焉遂從諸死烏請將事辭曰亡人
不佞失守社稷越在草莽吾子無所辱君命賓曰寡君

命下臣於朝曰阿下執事臣不敢貳主人曰君若惠顧先君之好照臨敝邑鎮撫其社稷則有宗祧在乃止衛侯固請見之不獲命以其良馬見為未致使故也衛侯以為乘馬賓將掇主人辭曰亡人之憂不可以及吾子草莽之中不足以辱從者敢辭賓曰寡君之下臣君之牧圉也若不獲扞外役是不有寡君也臣懼不免於戾請以除死親執鐸終夕與於燎

楚子西子期伐吳及桐汭陳侯使公孫貞子弔焉及良

而卒將以尸入吳子使太宰嚭勞且辭曰以水潦之不
時無乃廩然隕大夫之尸以重寡君之憂寡君敢辭上
介羊尹蓋對曰寡君聞楚為不道荐伐吳國滅厥民人
寡君使蓋備使弔君之下吏無祿使人逢天之感大命
隕隊絕世于良廢日共積一日遷次今君命逆使人曰
無以尸造于門是我寡君之命委于草莽也且臣聞之
曰事死如生禮也於是乎有朝聘而終以尸將事之禮
又有朝聘而遭喪之禮若不以尸將命是遭喪而還也

無乃不可乎以禮防民猶或踰之今大夫曰死而棄之
是棄禮也其何以為諸侯主先民有言曰無穢虐士備
使奉尸將命苟我寡君之命達于君所雖墮于深淵則
天命也非君與涉人之過也吳人內之

齊晏子使吳吳王謂行人曰吾聞晏嬰蓋北方之辯于
辭習于禮者也命儻者客見則稱天子明日晏子有事
行人曰天子請見晏子慨然者三曰臣受命敝邑之君
將使于吳王之所不佞而迷惑入于天子之朝吳王惡乎

存然後吳王曰夫差請見見以諸侯

晏子使于楚晏子短楚人為小門于大門之側而延晏子
晏子不入曰使至狗國者從狗門入今臣使楚不當從此
門儻者更從大門入見楚王王曰齊無人耶晏子對曰齊
之臨淄三百閭張袂成帷揮汗成雨比肩繼踵而在何
為無人王曰然則何為使子晏子對曰齊命使各有所主
其賢者使賢主不肖者使不肖主嬰最不肖故宜使楚耳
景公使晏子使于楚楚王進橘致削晏子不剖而并食

之楚王曰橘當去剖晏子對曰臣聞之賜人主前者瓜
挑不削橘袖不剖今萬乘無教臣不敢剖然臣非不知
也

晏子將使荆荆王聞之謂左右曰晏子賢人也今方來
欲辱之何以也左右對曰為其來也臣請縛一人過王
而行于是荆王與晏子立語有縛一人過王而行王曰
何為者也對曰齊人也王曰何坐曰坐盜王曰齊人固
盜乎晏子反顧之曰江南有橘齊王使人取之而樹之

於江北生不為橘乃為枳所以然者何其土地使之然也今齊人居齊不盜來之荆而盜得無土地使之然乎荆王曰吾欲傷子而反自中也

蔡使師強王堅使於楚楚王聞之曰人名多章章者獨為師強王堅乎趣見之無以次視其人狀疑其名而醜其聲又惡其形楚王大怒曰今蔡無人乎國可伐也有人不遣乎國可伐也端以此人誠寡人乎國可伐也故發二使見三謀伐者蔡也

越使諸發執一枝梅遺梁王梁王之臣曰韓子顧謂左
右曰惡有以一枝梅以遺列國之君者乎請為二三子
慚之出謂諸發曰大王有命客冠則以禮見不冠則否
諸發曰彼越亦天子之封也不得冀堯之州乃處海垂
之際屏外蕃以為居而蛟龍又與我爭焉是以剪髮文
身爛然成章以像龍子者將避水神也今大國其命冠
則見以禮不冠則否假令大國之使時過敝邑敝邑之
君亦有命矣曰客必剪髮文身然後見之於大國何如

意而安之願假冠以見意如不安願無變國俗梁王聞之披衣出以見諸發令逐韓子詩云維君子使媚于天子若此之謂也

魏文侯使舍人毋擇獻鵠于齊侯毋擇行道失之徒獻空籠見齊侯曰寡君使臣毋擇獻鵠道饑渴臣出而飲食之而鵠飛冲天遂不復反念思非無錢以買鵠也惡有為其君使輕易其幣者乎念思非不能拔劍刎頸腐肉骨暴於中野也為吾君貴鵠而賤士也念思非不敢

走陳蔡之間也惡絕兩君之使故不敢委身逃死來獻
空籠惟主君斧鑕之誅齊侯大悅曰寡人今者得茲言
三賢于鵠遠矣寡人有都鄙地百里願獻子大夫以為
湯沐邑毋擇對曰惡有為其君使而輕易其幣而利諸
侯之地乎遂出不反

魏文侯封太子擊于中山三年使不往來舍人趙倉唐
進稱曰為人子三年不聞父問不可謂孝為人父三年
不問子不可謂慈君何不遣人使大國乎太子曰願之

久矣未得可使者倉唐曰臣願奉使侯何嗜好太子曰嗜晨鳧好北犬于是乃遣倉唐繅北犬奉晨鳧獻于文侯倉唐至上謁曰孽子擊之使者不敢當大夫之朝請以燕間奉晨鳧敬獻庖厨繅北犬敬上消人文侯悅曰擊愛我所嗜知吾所好召倉唐而見之曰擊無恙乎倉唐曰唯唯如是者三乃曰君出太子而封之國君名之非禮也文侯怵然為之變容問曰子之君無恙乎倉唐曰臣來時拜送書于庭文侯顧指左右曰子之君長孰

與是倉唐曰禮擬人必于其倫諸侯無偶無所擬之曰
長大孰與寡人倉唐曰君賜之外府之裘則能勝之賜
之斤帶則不更其造文侯曰子之君何業倉唐曰業詩
文侯曰於詩何好倉唐曰好晨風黍離文侯自讀晨風
曰歎彼晨風鬱彼北林未見君子憂心欽欽如何如何
忘我實多文侯曰子之君以我忘之乎倉唐曰不敢時
思耳文侯復讀黍離曰彼黍離離彼稷之苗行邁靡靡
中心搖搖知我者謂我心憂不知我者謂我何求悠悠

蒼天此何人哉文侯曰子之君怨乎倉唐曰不敢時思耳文侯于是遣倉唐賜太子衣一襲勅倉唐以鷄鳴時至太子起拜受賜發篋視衣盡顛倒太子曰趣早駕君侯召擊也倉唐曰臣來時不受命太子曰君侯視擊衣不以為寒也欲召擊無誰與謀故勅子以鷄鳴時至詩曰東方未明顛倒衣裳顛之倒之自公召之遂西至謁文侯大喜乃置酒而稱曰夫遠賢而近所愛非社稷之長策也乃出少子摯封中山而復太子擊故曰欲知其

子視其友欲知其君視其所使趙倉唐一使而文侯為
慈父而擊為孝子太子乃稱詩曰鳳凰于飛噦噦其羽
亦集爰止藹藹王多吉士維君子使媚于天子舍人之
謂也

藺相如者趙人也為趙宦者令繆賢舍人趙惠文王時
得楚和氏璧秦昭王聞之使人遺趙王書願以十五城
請易璧趙王與大將廉頗諸大臣謀欲予秦秦城恐不
可得徒見欺欲勿予即患秦兵之來計未定求人可使

報秦者未得官者令繆賢曰臣舍人藺相如可使王問何以知之對曰臣嘗有罪竊計欲亡走燕臣舍人相如止臣曰君何以知燕王臣語曰臣嘗從大王與燕王會境上燕王私握臣手曰願結友以此知之故欲往相如謂臣曰夫趙彊而燕弱而君幸於趙王故燕王欲結於君今君乃亡趙走燕燕畏趙其勢必不敢留君而束君歸趙矣君不如肉袒伏斧質請罪則幸得脫矣臣從其計大王亦幸赦臣臣竊以為其人勇士有智謀宜可使于

是王召見問藺相如曰秦王以十五城易寡人之璧可予不
相如曰秦彊而趙弱不可不許王曰取吾璧不予我城奈何
相如曰秦以城求璧而趙不許曲在趙趙予璧而秦不予趙
城曲在秦均之二策寧許以負秦曲王曰誰可使者相如曰
王必無人臣願奉璧往使城入趙而璧留秦城不入臣請完
璧歸趙趙王于是遂遣相如奉璧西入秦秦王坐章臺見相
如相如奉璧奏秦王秦王大喜傳以示美人及左右左右皆
呼萬歲相如視秦王無意償趙城乃前曰璧有瑕請指示王

王授璧相如因持璧却立倚柱怒髮上衝冠謂秦王曰
大王欲得璧使人發書至趙王趙王悉召羣臣議皆曰
秦貪負其彊以空言求璧償城恐不可得議不欲予秦
璧臣以為布衣之交尚不相欺况大國乎且以一璧之
故逆彊秦之驩不可于是趙王乃齋戒五日使臣奉璧
拜送書于庭何者嚴大國之威以降敬也今臣至大王
見臣列觀禮節甚倨得璧傳之美人以戲弄臣臣觀大
王無意償趙王城邑故臣復取璧大王必欲急臣臣頭

今與璧俱碎于柱矣相如持其璧睨柱欲以擊柱秦王
恐其破璧乃辭謝固請召有司案圖指從此以往十五
都予趙相如度秦王特以詐佯為予趙城實不可得乃
謂秦王曰和氏璧天下所共傳寶也趙王恐不敢不獻
趙王送璧時齋戒五日今大王亦宜齋戒五日設九賓
于庭臣乃敢上璧秦王度之終不可彊奪遂許齋五日
舍相如廣成傳舍相如度秦王雖齋決負約不償城乃
使其從者衣褐懷其璧從徑道亡歸璧于趙秦王齋五

日後乃設九賓禮于庭引趙使者藺相如相如至謂秦王曰秦自繆公以來二十餘君未嘗有堅明約束者也臣誠恐見欺于王而負趙故令人持璧歸間至趙矣且秦彊而趙弱大王遣一介之使至趙趙立奉璧來今以秦之彊而先割十五都予趙趙豈敢留璧而得罪于大王乎臣知欺大王之罪當誅臣請就湯鑊唯大王與羣臣熟計議之秦王與羣臣相視而嘻左右或欲引相如去秦王因曰今殺相如終不能得璧也而絕秦趙之驩

不如因而厚遇之使歸趙趙王豈以一璧之故欺秦耶
卒廷見相如畢禮而歸之相如既歸趙王以為賢大夫
使不辱于諸侯拜相如為上大夫秦亦不以城予趙趙
亦終不予秦璧

孟嘗君為從公孫弘謂孟嘗君曰君不如使人先觀秦
王意者秦帝王之主也君恐不得為臣奚暇從以難
之意者秦王不肖之主也君從以難之未晚孟嘗君曰
善願因請公往矣公孫弘敬諾以車十乘之秦昭王聞

之而欲愧之以辭公孫弘見昭王曰薛公之地大小幾
何公孫弘對曰百里昭王笑而曰寡人地數千里猶未
敢以有難也今孟嘗君之地方百里而因欲以難寡人
猶可乎公孫弘對曰孟嘗君好人大王不好人昭王曰
孟嘗君之好人也奚如公孫弘曰義不臣乎天子不友
乎諸侯得志不慙為人主不得志不肯為人臣如此者
三人而治可為管商之師說義聽行能致其主霸王如
此者五人萬乘之嚴主也辱其使者退而自刎必以其

血漉其衣如臣者十人昭王笑而謝之曰客胡為若此寡人直與客論耳寡人善孟嘗君欲客之必諭寡人之志也公孫弘曰敬諾公孫弘可謂不侵矣昭王大國也孟嘗千乘也立千乘之義而不可陵可謂足使矣

齊王使使者問趙威后書未發威后問使者曰歲亦無恙耶民亦無恙耶王亦無恙耶使者不說曰臣奉使使威后今不問王而先問歲與民豈先賤而後尊貴者乎威后曰不然苟無歲何有民苟無民何有君故有問舍

本而問未者耶乃進而問之曰齊有處士曰鍾離子無恙耶是其為入也有糧者亦食無糧者亦食有衣者亦衣無衣者亦衣是助王養其民者也何以至今不業也葉陽子無恙乎是其為人哀鰥寡卹孤獨振困窮補不足是助王息其民者也何以至今不業也北宮之女嬰兒子無恙耶徹其環瑱至老不嫁以養父母是皆率民而出于孝情者也胡為至今不朝也此二士弗業一女不朝何以王齊國子萬民乎於陵子仲尚存乎是其為

人也上不臣於王下不治其家中不索交諸侯此率民而出於無用者何為至今不殺乎

秦攻魏取寧邑諸侯皆賀趙王使賀三反不得通趙王憂之謂左右曰以秦之強得寧邑以制齊趙諸侯皆賀吾往賀而獨不得通此必加兵我為之奈何左右曰使者三往不得通者必所使者非其人也曰諒毅者辯士也大王可試使之諒毅親受命而往至秦獻書秦王曰大王廣地寧邑諸侯皆賀敝邑寡君亦竊嘉之不敢寧

居使下臣奉其幣物三至王廷而使不得通使若無罪
願大王無絕其權若使者有罪願得請之秦王使使者
報曰吾所使趙國者小大皆聽吾言則受書幣若不從
吾言則使者歸矣諒毅對曰下臣之來固願承大國之
意也豈敢有難大王若有以令之請奉而行之無所敢
疑於是秦王乃見使者曰趙豹平原君數欺弄寡人趙
能殺此二人則可若不能殺請令率諸侯受命邯鄲城
下諒毅曰趙豹平原君親寡君之母弟也猶大王之有

葉陽涇陽君也大王以孝治聞於天下衣服之便於體
膳啗之嫌於口未嘗不分於葉與涇陽君葉陽君涇陽
君之車馬衣服無非大王之服御者臣聞之有覆巢毀
卵而鳳凰不翔剝胎焚天而麒麟不至今使臣受大王
之令以還報敝邑之君畏懼不敢不行無乃傷葉陽君
涇陽君之心乎秦王曰諾勿使從政諒毅曰敝邑之君
有母弟不能教誨以惡大國請黜之勿使與政事以稱
大國秦王乃喜受幣而厚遇之 惠文王之世趙勢尚

強秦雖屢奪趙地而趙亦屢伐秦閔與之敗秦終不能
逞志于趙當時之臣外則廉頗趙奢為之禦侮內則藺
相如之徒一璧之微一鼓瑟之恥為之死今而告其使
曰必殺而二母弟以聽命則雖垂亡之國猶有所不受
而秦豈能必趙之從哉徒大言以虛張之耳諒毅之對
婉而不迫稱譬當于人心秦知其不可奪故轉而言曰
勿使從政其情亦窮矣毅因而順其意則未免失辭使
毅應之曰敝邑之君有母弟而授之以政也亦惟先王

之故以共衛社稷大國馮恃其威日尋于兵是以二子大懼殄滅之及以與寡君周旋其獲戾于大國則職此之由忠而不貳臣之職也討貳勸忠大國之義也今將討二子之忠而使之釋敝邑之政其何以為勸雖大國亦將有不利焉臣不知所命以是告之庶幾不失其對矣

趙王遣使者之楚方鼓瑟而遣之誠之曰必如吾言使者曰王夙鼓瑟未嘗悲若此也王曰宮商固方調矣使

者曰調則何不書其柱耶王曰天有燥濕絃有緩急宮商移徙不可知是以不書使者曰明君之使人也任之以事不制以辭遭吉則賀之凶則吊之今楚趙相去千有餘里吉凶禍患不可預知猶柱之不可書也詩云莘莘征夫每懷靡及

秦王使人言於安陵君曰寡人欲以五百里之地易安陵安陵君其許寡人安陵君曰大王加惠以大易小甚善雖然受地於先王願終守之弗敢易秦王不說安陵

君因使唐睢使於秦秦王謂唐睢曰寡人以五百里之地易安陵安陵君不聽寡人何也且秦滅韓亡魏而君以五十里之地存者以君為長者故不錯意也今吾以十倍之地請廣於君而君逆寡人者輕寡人與唐睢對曰否非若是也安陵君受地於先王而守之雖千里不敢易也豈直五百里哉秦王怫然怒謂唐睢曰公亦嘗聞天子之怒乎唐睢對曰臣未嘗聞也秦王曰天子之怒伏屍百萬流血千里唐睢曰大王嘗聞布衣之怒乎

秦王曰布衣之怒亦免冠徒跣以頭搶地耳唐睢曰此庸夫之怒也非士之怒也夫專諸之刺王僚也彗星襲月聶政之刺韓傀也白虹貫日要離之刺慶忌也蒼鷹擊於殿上此三子皆布衣之士也懷怒未發休祲降於天與臣而將四矣若士必怒伏屍二人流血五步天下縞素今日是也挺劍而起秦王色撓長跪而謝之曰先生坐何至於此寡人諭矣夫韓魏滅亡而安陵以五十里之地存者徒以有先生也

漢陸賈從高祖定天下名為有口辯士居左右嘗使諸侯及高祖時中國初定尉陀平南越因王之高祖使陸賈賜尉陀印為南越王陸生至尉陀椎結箕踞見陸生陸生因說陀曰足下中國人親戚昆弟墳墓在真定今足下棄反天性捐冠帶欲以區區之越與天子抗衡為敵國禍且及身矣且夫秦失其政諸侯豪傑並起惟漢王先入關據咸陽項籍倍約自立為西楚霸王諸侯皆屬可謂至彊然漢王起巴蜀鞭笞天下劫諸侯遂誅項

羽滅之五年之間海內平定此非人力天之所建也天子聞君王南越不助天下誅暴逆將相欲移兵而誅王天子憐百姓新勞苦且休之遣臣授君王印剖符通使君宜郊迎北面稱臣乃欲以新造未集之越屈彊于此漢誠聞之掘燒君王先人冢墓夷種宗族使一偏將將十萬衆臨越則殺王以降漢如反覆手耳于是尉陀乃蹶然起坐謝陸生曰居蠻夷中久殊失禮義因問陸生曰我孰與蕭何曹參韓信賢陸生曰王似賢復問

我孰與皇帝賢陸生曰皇帝起豐沛討暴秦誅強楚為天下興利除害繼五帝三王之業統理中國中國之人以億計地方萬里居天下之膏腴人衆車輿萬物殷富政由一家自天地剖判未嘗有也今王衆不過數十萬皆蠻夷踦蹠山海之間譬若漢一郡何可乃比于漢王尉陀大笑曰吾不起中國故王此使我居中國何遽不若漢乃大悅陸生與留飲數月曰越中無足與語至生來令我日聞所不聞賜陸生橐中裝直千金佗送亦千

金陸生拜尉陀為南越王令稱臣奉漢約歸報高祖大
悅拜為大中大夫

鄭衆使北匈奴單于欲令衆拜衆不為屈單于圍守閉
之不與水火衆拔刀自誓單于恐而止乃更發使隨衆
還京師匈奴雖遣使入貢而寇抄不息明帝議遣使報
其使者復遣衆往衆因上言臣前奉使不為匈奴拜單
于志恨遣兵圍臣今復銜命必見陵折臣誠不忍持大
漢節對氈裘獨拜如今匈奴遂能服臣將有損大漢之

彊明帝不聽衆既行在路連上書固爭之詔切責衆追
還繫廷尉其後明帝見匈奴來者聞衆與單于爭禮之
狀乃復召衆為軍司馬

漢後帝遣鄧芝以中郎將脩好于吳時吳王猶未與魏
絕狐疑不時見芝芝乃自表請見曰臣今來亦欲為吳
非但為蜀也吳王見之曰孤誠願與蜀和親然恐蜀主
幼弱國小執偏為魏所乘不自保全耳芝對曰吳蜀二
國四州之地大王命世之英諸葛亮亦一時之傑也蜀

有重險之固吳有三江之阻合此二長共為唇齒進可
并兼天下退可鼎足而立大王今若委質於魏魏必上
望大王之入朝下求太子之內侍若不從命則奉辭伐
叛蜀亦順流見可而進如此江南之地非復大王之有
也吳遂絕魏專與漢連和

吳王遣中大夫趙咨入謝魏文帝問曰吳王何等主也
對曰聰明仁智雄略之主也文帝問其狀對曰納魯肅
於凡品是其聰也拔呂蒙於行陳是其明也獲于禁而

不害是其仁也取荊州兵不血刃是其智也據三州虎
視於天下是其雄也屈身於陛下是其畧也文帝曰吳
王頗知學乎咨曰吳王浮江萬艘帶甲百萬任賢使能
志存經畧雖有餘閑博覽書傳歷史籍采奇異不效書
生尋章摘句而已文帝曰吳可征不對曰大國有征伐之兵
小國有備禦之固文帝曰吳難魏乎對曰帶甲百萬江
漢為池何難之有文帝曰吳如大夫者幾人對曰聰明
特達者八九十人如臣之比車載斗量不可勝數

晉裴嶷至建康盛稱慕容廆之德元帝謂嶷曰卿中朝名臣當留江東嶷曰臣少蒙國恩出入省闈若得復奉輦較臣之至榮但以舊京淪沒山陵穿毀雖名臣宿將莫能雪恥獨慕容龍驤竭忠王室志除凶逆故使臣萬里歸誠今臣來而不返必謂朝廷以其僻陋而棄之孤其嚮義之心使懈體於討賊此臣之所甚惜是以不敢徇私而忘公也元帝曰卿言是也乃遣使隨嶷拜廆安北將軍平州刺史

涼州張駿遣參軍王隲聘於趙趙主曜謂之曰貴州欵
城和好卿能保之乎隲曰不能侍中徐邈曰君來結好
而云不能保何也隲曰齊桓貫澤之盟憂心兢兢諸侯
不召自至葵丘之會振而矜之叛者九國趙國之化常
如今日可也若政教陵遲尚未能察邇者之變况鄙州
乎曜曰此涼州之君子也擇使可謂得人矣厚禮而遣
之

張駿遣治中從事張淳稱藩於成以假道通表建康李

雄偽許之將使盜覆諸東峽蜀人密以告淳淳謂雄曰
寡君使小臣行無迹之地萬里通誠於建康者以陛下
嘉尚忠義能成人之美故也若欲殺臣者當斬之都市
宣示衆目今使盜殺之江中威刑不顯豈足以示天下
乎雄大驚曰安有此邪景騫請留之謂淳曰天熱可且
遣下吏淳曰寡君以皇輿播越梓宮未返生民塗炭莫
之振救故遣臣通誠上都所論事重非下吏所能傳雖
火山湯海猶將赴之豈寒暑之足憚哉雄謂淳曰貴主

英名蓋世上險兵彊何不亦稱帝自娛一方淳曰寡君祖考以來世篤忠貞以讐恥未雪枕戈待旦何自娛之有雄甚慙曰我之祖考本亦晉臣遭天下大亂與六郡之民避難此州為衆所推遂有今日琅邪若能中興亦當帥衆輔之厚為淳禮而遣之淳卒致命於建康

秦符生聞張祚見殺立靚幼冲命其征東符柳叅軍閻負梁殊使涼州以書喻之負殊至姑臧立靚年幼不見殊等其涼州牧張瓘謂負殊曰孤之本朝世執忠節遠

宗大晉臣無境外之交君等何為而至負殊曰晉王以鄰藩義好有自來矣雖擁阻山河然風通道會不欲使羊陸二公獨美于前主上以欽明紹統八表宅心光被四海格于天地晉王思與張王齊曜大明交玉帛之好兼與君公同金蘭之契是以不遠而來有何怪乎瓘曰羊陸一時之事亦非純臣之義也本朝六世重光固忠不貳若與符征東交玉帛之好者便是上違先公純誠雅志下乖河右遵奉之情負殊曰昔微子去殷項伯歸

漢雖背君違親前史美其先覺亡晉之餘遠逃江會天命去之故尊先王翻然改圖北面二趙蓋神筭無方鑿機而作君公若欲稱制河西衆旅非秦之敵如欲宗歸遺晉深乖先君雅旨孰若遠蹤竇雄附漢之規近述先王歸趙之事垂祚無窮永享遐祉乎瓘曰中州無信好食誓言徃與石氏通好旋見寇襲中國之風誠在昔日不足復論通和之事也負殊曰三王異政五帝殊風趙多奸詐秦以義信豈可同年而語哉張先楊初皆擅兵

一方不供王貢先帝命將擒之宥其難恕之罪加以爵
封之榮今上道合二儀慈弘山海信符陰陽御物無際
不可以二趙相況也瓘曰秦若兵彊化盛自可先取江
南天下自然盡為秦有何辱征東之命負殊曰先帝以
大聖神武開構鴻基彊燕納款八州順軌主上欽明道
必隆世慨嶽號擁于河西正朔未加吳會以吳必須兵
涼可以義故遣行人先申大好如君公不能蹈機而發
者正可緩江南數年之命迴師西旆恐涼州弗可保也

權曰我跨據三州帶甲十萬西包崑崙東阻大河伐人有餘而况自固秦何能為患負殊曰貴州險塞孰若嶺函五郡之衆何如秦雍張琚杜洪因趙之成資據天阻之固策三秦之銳藉陸海之饒勁士風集驍騎如雲自謂天下可平關中可固先帝神矛一指望旗冰解人詠來蘇不覺易主燕雖武視關東猶以地勢之義逆順之理北面稱藩貢不踰月致肅慎楛矢通九夷之珍單于屈膝名王內附控絃之士百有餘萬鼓行而濟西河者

君公何以抗之盍追遵先王臣趙故事世享大美為秦
之西藩瓘曰然秦之德義加於天下江南何以不賓負
殊曰文身之俗負阻江山道濬先叛化盛後賓自古而
然豈但今也故詩曰蠢爾蠻荆大邦為仇言其不可以
德義懷也瓘曰秦據漢舊都地兼將相文武輔臣領袖
一時者誰也負殊曰皇室懿藩忠在公旦者則大司馬
武都王安征東大將軍晉王柳文武兼才神器秀拔入
可允釐百工出能折衝萬里者衛大將軍廣平王黃眉

後將軍清河王法龍驤將軍東海王堅之兄弟其耆年
碩德侔尚父者則大師錄尚書事廣寧公魚遵其清素
剛嚴骨鯁貞亮則左光祿大夫強平金紫光程肱牛夷
博聞廣識探賾索幽則中書監胡文中書令王魚黃門
侍郎李柔雄毅厚重權智無方則左衛將軍李威右衛
將軍符雅才識明達令行禁止則特進領御史中丞梁
平老特進光祿大夫強注侍中尚書呂婆樓文史富瞻
蔚為文宗則尚書右僕射董榮祕書監王颺著作郎梁

讜驍勇多權畧攻必取戰必勝闖張之流萬人之敵者
則前將軍新興王飛建節將軍鄧羗立忠將軍彭越安
遠將軍范俱難建武將軍徐盛常伯納言卿校牧守則
人皆文武莫非才賢其餘懷經世之才蘊佐時之畧守
南山之操遂而不奪者王猛朱彤之倫相望於巖谷濟
濟多士焉可罄言姚襄張平一時之傑各擁衆數萬狼
顧偏方皆委忠獻款請為臣妾小不事大春秋所誅惟
君公圖之瓘笑曰此事決之主上非身所了負殊曰涼

王雖天縱英睿然尚幼冲君公居伊霍之任安危所繫見機之義實在君公瓘雖新輔政河西所在兵起懼秦師之至乃言於玄靚遣使稱藩生因其所稱而授之

周崎邵陵人也為湘州從事王敦之難譙王承使崎求救於外與周該俱為魏乂偵人所執乂責崎辭情臨以白刃崎曰州將使求援於外本無定指隨時制宜耳又謂崎曰汝為我語城中稱大將軍已破劉隗戴若思甘卓住襄陽無復異議三江州郡萬里肅清外援理絕如

是者我當活汝。岢偽許之。既到城下，大呼曰：「王敦軍敗於于湖，甘安南已剋武昌，即日分遣大衆來赴此，急努力堅守，賊今散矣。」於是數而殺之。

魏李順奉使至涼涼主蒙遜遣楊定歸謂順曰：「年衰多疾，不堪拜伏，小差當相見。」順曰：「王之老疾朝廷所知，豈得自安不見詔使？蒙遜延順入至庭中，蒙遜箕坐，隱几無動起之狀，順正色大言曰：「不謂此叟無禮，乃至於此。今不憂覆亡而敢陵侮天地魂魄，逝矣，何用見之？」握節

將出涼主追止之曰傳聞朝廷有不拜之詔是以敢自
安耳順曰齊桓公九合諸侯一匡天下周天子賜胙命
無下拜桓公猶不敢失臣禮下拜登受今王雖功高未
如桓公朝廷雖相崇重未有不拜之詔而遽自偃蹇此
豈社稷之福邪蒙遜乃起拜受詔使還魏主問以涼事
順曰蒙遜控制河右經涉艱難粗識機變雖不能貽厥
孫謀猶足以終其一世然禮者德之與敬者身之基也
蒙遜無禮不敬以臣觀之不復年矣諸子又皆庸才也

如聞敦煌太守牧捷器性粗立繼蒙遜者必此人也然比之於父皆云不及此殆天之所以資聖明也

齊散騎常侍裴昭明如魏弔欲以朝服行事魏主客曰弔有常禮何得以朱衣入凶庭昭明等固執不可魏遣著作郎成淹與之言昭明曰魏朝不聽使者朝服出何典禮淹曰吉凶不相厭羔裘玄冠不以弔此童稚所知也昔季孫如晉求遭喪之禮以行今卿自江南遠來弔魏方問出何典禮行人得失何其遠哉昭明曰齊高皇

帝之喪魏遣李彪來弔初不素服齊朝亦不以為疑何
至今日獨見要逼淹曰齊不能行亮陰之禮踰月即吉
齊之君臣鳴玉盈庭韶璫曜目彪敢獨以素服廁其間
乎皇帝仁孝執親之喪居廬食粥豈得以此方彼乎昭
明乃曰使人之來唯齋袴褶此既戎服不可以弔唯主
人裁其弔服乃以衣帽給昭明等使服入見文武皆哭
盡哀魏高祖嘉淹之敏遷侍郎

東魏遣散騎常侍李諧來聘至建康武帝引見與語應

對如流諧等出武帝目送之謂左右曰朕今日遇勅敵
卿輩常言北間全無人物此等何自而來時南北通好
務以俊乂相誇銜命接客必盡一時之選無才地者不
得與焉每梁使至鄴鄴下為之傾動貴勝子弟盛飾聚
觀禮贈優渥館門成市宴日高澄常使左右覘之一言
制勝澄為之拊掌魏使至建康亦然唐高祖時突厥寇
廉州遣鄭元璠詣頡利是時突厥精騎數十萬自介休
至晉州數百里間填溢山谷元璠見頡利責以負約與

相辨詰頡利頗慙元璿因說頡利曰唐與突厥風俗不
同突厥雖得唐地不能居也今虜掠所得皆入國人於
可汗何有不如旋師復修和親可無跋涉之勞坐受金
幣又皆入可汗府庫孰與棄昆弟積年之歡而結子孫
無窮之怨乎頡利悅引兵還元璿自義寧以來五使突
厥幾死者數焉僕固懷恩死肅宗憐其有功置其女宮
中養以為女回紇請以為可敦五月冊以為崇徽公主
遣兵部侍郎李涵送之涵奏嗣部郎中董晉為判官至

回紇回紇言唐約我為市馬既入而歸我賄不足我於
使人乎取之涵懼不敢對晉曰吾非無馬而與汝為市
馬汝賜不既多乎爾之馬歲至吾數皮而歸資邊吏請
致詰也天子念汝有功故下詔禁侵犯諸戎畏我大國
之與爾也莫敢校焉爾之父子寧而蓄馬蕃者非我誰
使之於是其衆皆環晉拜既又相帥南面序立皆舉兩
手曰不敢有意大國

穆宗遣韓愈慰軍朱克融既得旌節乃出張弘靖等而

庭湊不解深州之圍詔愈至境更觀事勢勿遽入愈曰
止君之仁死臣之義遂往至鎮庭湊拔刀弦弓以迎之
及館甲士羅於庭庭湊言曰所以紛紛者乃此曹所為
非庭湊心愈厲聲曰天子以尚書有將帥材故賜之節
鉞不知尚書乃不能與健兒語邪甲士前曰先太師為
國擊走朱滔血衣猶在此軍何負朝廷乃以為賊乎愈
曰汝曹尚能記先太師則善矣夫逆順之為禍福豈遠
邪自祿山思明以來至元濟師道其子孫有今尚存者

乎田令公以魏博歸朝廷子孫孩提皆為美官王承元以此軍歸朝廷弱冠建節劉悟李祐皆為節度使汝曹亦聞之乎庭湊恐衆心動麾之使出謂愈曰侍郎來欲何為愈曰神策諸將如牛元翼者不少但朝廷顧大體不可棄之耳尚書何為圍之不置庭湊曰即當出之因與愈宴禮而歸之未幾元翼將十騎突圍出深州

後梁晉王聞燕主守光稱帝大笑曰俟彼卜年吾當問其鼎矣張承業請遣使致賀以驕之晉王遣太原少尹

李承勳往承勳至幽州用鄰藩通使之禮燕之典客者
曰吾王帝矣公當稱臣庭見承勳曰吾受命於唐朝為
太原少尹燕王自可臣其境內豈可臣他國之使乎守
光怒囚之數日出而問之曰臣我乎承勳曰燕王能臣
我王則我請為臣不然有死而已守光竟不能屈

後唐明宗遣供奉官姚坤告哀於契丹契丹主聞莊宗
為亂兵所害慟哭曰我朝定兒也吾方欲救之以勅海
未下不果往致吾兒及此彼言朝定猶華言朋友也又

謂坤曰今天子聞洛陽有急何不救對曰地遠不能及
曰何故自立坤為言明宗所以即位之由契丹主曰牽
牛以蹊人之田而奪之牛可乎坤曰中國無主唐天子
不得已而立契丹主曰又聞吾兒專好聲色遊畋不恤
軍民宜其及此我自聞之舉家不飲酒散遣伶人解縱
鷹犬若亦効吾兒所為行自亡矣又曰吾兒與我雖世
舊然屢與我戰爭於今天子則無怨足以修好若與我
大河之北吾不復南侵矣坤曰此非使臣之所得專也

契丹主怒囚之旬餘復召之曰河北恐難得得鎮定幽州亦可也給紙筆趣令為狀坤不可欲殺之韓延徽諫乃復囚之

張文寶泛海使杭州船壞水工以小舟濟之風飄至天長吳主厚禮之儀服錢幣數萬文寶獨受飲食餘皆辭之曰本朝與吳久不通問今既非君臣又非賓主若受茲物何辭以謝吳主嘉之竟違命於杭州而還

唐主復以孫晟為司空遣與禮部尚書王崇質奉表入

見稱自天祐以來海內分崩或跨據一方或遷革異代
臣紹襲先業奄有江表顧以瞻烏未定附鳳何從今天
命有歸聲教遠被願奉正朔謹守土疆乞收薄伐之威
赦其後服之罪首於下國俾作外臣則柔遠之德云誰
不服晟謂馮延巳曰此行當在左相晟若辭之則負先
帝既行知不免中夜歎息謂崇質曰家君百口宜自為
謀吾思之孰矣終不負永陵一坏土餘無所知孫晟等
至上所世宗遣中使以孫晟詣壽春城下示劉仁贍且

招諭之仁贍見晟戎服拜於城上晟謂仁贍曰君受國厚恩不可開門納寇周世宗聞之甚怒晟曰臣為唐宰相豈可教節度使外叛邪世宗乃釋之

張永德與李重進不相悅永德密表重進有二心周世宗不之信唐主聞之以蠟書遣重進誘以厚利其書皆謗毀及反問之語重進奏之初唐使者孫晟鍾謨從世宗至大梁世宗待之甚厚每朝會班於中書省官之後時召見飲以醇酒問以唐事晟但言唐王畏陛下神武

事陛下無二心及得唐蠟書世宗大怒召晟責以所對不實晟正色抗辭請死而已問以唐虛實默不對世宗命都承旨曹翰送晟於右軍巡院更以帝意問之翰與之飲酒數行從容問之晟終不言翰乃謂曰有敕賜相公死晟神色怡然索靴笏整衣冠南向拜曰臣謹以死報國乃就刑并從者百餘人皆殺之貶鍾謨耀州司馬既而世宗憐晟忠節悔殺之

後周馬希萼之帥羣蠻破長沙也府庫累世之積皆為

淑州蠻酋符彥通所掠彥通由是富彊稱王於谿洞間
王遠既得湖南欲遣使撫之募能往者其將王虔朗請
行既至彥通盛待衛而見之禮貌甚倨虔朗厲聲責之
曰足下自稱符秦苗裔宜知禮義有以異於羣蠻昔馬
氏在湖南足下祖父皆北面事之今王公盡得馬氏之
地足下不早往乞盟致使者先來又不接之以禮異日
得無悔乎彥通慙懼起執虔朗手謝之虔朗知其可動
因說之曰溪洞之地隋唐之世皆為州縣著在圖籍今

足下上無天子之詔下無使府之命雖自王於山谷之間不過蠻夷一酋長耳曷若去王號自歸於王公王公必以天子之命授足下節度使與中國侯伯等夷豈不尊榮哉彥通大喜即日去王號因虔朗獻銅鼓數枚於王達達曰虔朗一言勝數萬兵真國士也承制以彥通為黔中節度使以虔朗為都指揮使

西上閭門使曹彬使于吳越賜吳越王弘做騎軍鋼甲二百步軍甲五千及他兵器彬事畢並返不受饋遺吳

越人以輕舟追與之至於數四彬曰吾終不受是竊名也盡籍其數歸而獻之世宗曰鄉之奉使者乞勺無厭使四方輕朝命卿能如是甚善然彼以遺卿卿自取之彬始拜受悉以散於親識家無留者

宋孫洙擇使策 今北方彊抗中夏若古之大敵國聘問歲至日窺吾國家之隙暴侮甚矣朝廷比遣使介初不擇人頗無辯對之材可使張明中國之威信以警伏強敵之心者苟欲以奉使幣賜寵之故所遣使人不復

有稱於絕域者徒侈潔車服整飾鬪旅以夸視於夷落
細禮曲謹悉受訓策屈膝北庭拜望跪起少不敢輒異
還上語記一辭不中繩度則按以重罪遣削黜矣雖復
間選左右名德方重之臣然皆束于儀矩屈鬱憤結俯
仰上下雖有勁辭直氣竒謀博辯刀筆在後蓄不得發
其毅然欲存國大體者法吏反以為生事而左遷之故
妄庸之臣苟欲畢事低首下視暗不敢高吐氣甚者或
發狂疾以自免或對館人醉舞蹈笑呼妄諾重為敵

人之所姍笑彼國主方驕吾以繁禮妄說之未足怪也
至于主客之員館勞王人者亦復狂誕晨夜皆邀枉王
人屢省而蹇仰自便甚可怪也夫以堂堂中國而一介
之使如此折辱天威墮損國命臣竊羞之昔漢鄭衆不
忍持大漢節對氊裘獨拜而拔刀自誓唐高僧堅立不
動責可汗之失禮李景畧以氣制梅祿坐受其拜近者
晉天福中王權猶曰義不能稽顙于穹廬之長而違詔得
罪欣然就貶故大節之士直躬徇義者非私一身而以

尊主上重國家也今陛下待之過厚責使者之法太密故不復有倜儻偉節之士立威名于敵國而使彼知中國之多賢也而使者亦復氣息奄然不自振起唯敵人之所媮視而踞俟之臣聞古之大夫出疆有可以安國家定社稷者專之也又曰受命不受辭何則機事之會間不容一息樽俎之間折衝萬里豈復拘以應對之細失容貌之苛謹哉陛下宜與大臣預擇廷臣辯論通古今剛直有威望者俾使北庭使一言足以雄中國之威

奪彊隣之氣譬說禍福以厭抑敵人之心其舉動言辭小不合者無法以繩之非有大過類可濶畧使得馳騁辯博應變不窮則專對造命之士出矣

徽宗遣趙良嗣至燕謂金主曰本朝徇大國多矣豈平灤一事不能相從邪金主曰平灤欲作邊鎮不可得也遂議租税金主曰燕租六百萬止取一百萬不然還我涿易舊彊及常勝軍我且提兵按邊良嗣曰本朝自以兵下涿易今乃云爾豈無曲直邪且言御筆許十萬至

二十萬不敢擅增乃令良嗣歸報金主謂之曰過半月不至吾提兵往矣時左企弓嘗以詩獻金主曰君王莫聽捐燕議一寸山河一寸金故金人欲背初約要求不已良嗣既還金聞遼主謀復故地乃悉斷盧溝北橋梁焚次舍以防之良嗣行至雄州以金書遞奏其畧言貴朝兵不克夾攻特因已力下燕所以拘稅今據燕管內每年租六百萬貫良嗣等稱御筆許二十萬以工不敢自專其平灤等州不在許限僮務侵求難終信義仍速

追過界之兵王黼欲功之速成乃請復遣良嗣自雄州再往使許遼人舊歲幣四十萬之外每歲更加燕京代稅錢一百萬緡及議畫疆與遣使賀正旦生辰置權場交易金主大喜遂使尼楚赫等持誓書草來許以燕京及六州來歸而山後諸州及西北一帶接連山川不在許與之限帝曲意從之遣盧益趙良嗣等持誓書往至涿州金谷神等先索書觀之言其字畫不謹令易之益言帝親書所以示尊崇於大國也金人不聽凡至汴京

更易者數四金人又言近有燕人趙溫訊等逃出南朝
須先還方可議交燕地良嗣諭宣撫司縛送溫訊於金
既至尼瑪哈釋其縛而用之金人又求糧良嗣許以二十
萬石

鄂爾多自東平還雲中尼瑪哈自濟州還燕山高宗遣
洪皓如金遺尼瑪哈書願去尊號用金正朔比于藩臣
時所在盜梗皓艱難百端得達太原留一年遣至雲中
尼瑪哈迫所使任劉豫皓曰萬里銜命不得奉兩宮南

歸恨力不能磔逆豫忍事之邪留亦死不即豫亦死不願偷生狗鼠間願就鼎鑊無悔尼瑪哈怒將殺之旁一校曰此真忠臣也因止劍士為皓跪請得流遞冷山

張邵至濰州見達蘭命邵拜邵曰監軍與邵為南北朝從臣無拜禮且具書言兵不在強弱在曲直天未厭宋而金乃裂地以封劉豫復窮兵不已曲有在矣達蘭怒取國書去送邵密州囚于祚山砦

金高忠建至臨安議遣使報聘且賀即位工部侍郎張

闡請嚴遣使之命正敵國之禮彼或不從則有戰耳如是則中國之威可以復振高宗然之遂遣洪邁充賀登極使帝謂執政曰向日講和本為梓宮太后雖屈已卑辭有所不憚今兩國之盟已絕宜正名畫境朝儀歲幣當先定之邁乃奏接伴禮儀十有四事既而忠建責事以臣禮以取新復州郡陳康伯以義責之乃止邁行書用敵國禮帝手札賜邁曰祖宗陵寢隔濶三十年不得以時洒掃祭祀心實痛之若彼能以河南地見歸必欲

居尊如故正復屈已亦何所惜邁奏言山東之兵未解則兩國之好不成立至燕金閣門見圖書不如式抑令于表中改陪臣二字朝見之儀必欲用舊禮邁執不可金鎖使館三日水漿不通及見金人語不遜欲留邁張皓不可乃遣還邁皓季子也

建炎以來奉使如金被拘囚者三十餘人多已物故惟洪皓張邵朱弁三人以和議成許歸已而金人遣七騎追之及淮而皓等已在舟中矣皓居冷山距會迎二百

里地苦寒穴居百餘家陳王谷神聚落也谷神敬皓使
教其子或二年不給衣食盛夏衣麤布嘗大雪薪盡以
馬矢然火煨麩食之或獻取蜀策谷神持以問皓皓力
折之谷神銳意南侵曰孰謂海大我力可乾但不能使
天地相拍耳皓復辯之谷神怒曰汝作和事官而口硬
如此謂不能殺汝邪皓曰自分當死顧大國無受殺行
人之名願投之于水以墜淵為辭可也谷神義之而止
皓屢因諜者密奏敵情且力言和議非計請興師進擊

嘗求韋太后書遣李微持歸帝大喜曰朕不知太后寧
否幾二十年雖遣使百輩不如此一書每遇貴族名家
子流落于金者盡力拯救之留金十五年而還入對內
殿求郡養母帝曰卿忠貫日月志不忘君雖蘇武不能
過豈可捨朕去邪皓退見秦檜語連日不止曰張和公
金人所憚乃不得用錢塘暫居為景靈宮太廟皆極土
木之華豈非示無中原意乎檜不懌遂除徽猷閣直學
士提舉萬壽觀復以論事忤檜出知饒州邵被囚柞山

踰年送劉豫使用之邵見豫長揖而已又呼豫為殿院責以君臣大義詞氣俱厲豫怒械于獄久之復送至金拘之燕山僧寺從者皆莫知所之邵又以書言于金曰劉豫挾大國之勢日夜南侵不勝則首鼠兩端勝則如養鷹飽則颺去終非大國之利金人從之會寧及還入見除秘書脩撰主管佑神觀司諫詹大方論其使事無成改台州崇道觀弁副王倫使金既就館守之以兵久之金將議和當遣一人受書還欲弁與倫探策決去留

弁曰吾來固自分必死豈應今日覲幸先歸願正使受
書歸報天子成兩國之好早申四海之養于兩宮則吾
雖暴骨外國猶生之年也倫將歸弁謂曰古之使者有
節以為信今無節有印印亦信也願留之使弁得抱以
死死不腐矣倫解以授弁弁受而懷之卧起與俱金人
迫弁仕劉豫且誅之曰此南歸之漸弁曰豫國賊吾嘗
恨不食其肉又忍北面臣之吾有死耳金人怒絕其餼
遺以困之弁固拒驛門忍饑待盡誓不為屈金人感動

致禮如初久之復欲易其官弁曰吾官受之本朝有死而已誓不易以辱吾君也又以書訣洪皓曰殺行人非細事吾曹遭之命也要當舍生以全義耳乃具酒召被掠士夫飲半酣語之曰已得近郊某寺地一旦畢命報國諸公幸瘞我其處題其上曰有宋通問副使朱公之墓于我幸矣衆皆泣下莫能仰視弁談笑自若曰此臣子之常諸君何悲也及尼瑪哈死弁密疏金國虛實曰此不可失之時也遣李發間行歸報王倫還以弁奉送

徽宗大行之文為獻其辭有曰歎馬角之未生魂消雪
窖攀龍髯而莫逮淚灑冰天帝讀之感泣官其親屬五
人謂丞相張浚曰弁歸日當以禁林處之及還入見便
殿弁謝且曰陛下與金人講和上返梓宮次迎太母此
皆知時知幾之明然時運而往或難固執機動有變宜
鑑未兆盟可守而詭詐之心宜嘿以待之兵可息而消
弭之術宜詳以講之金人以黷武為至德以苟安為大
平虐民而不恤民廣地而不廣德此皆天助中興之勢

若時與幾陛下既知于始願圖厥終帝曰善秦檜惡其
言奏以初補官易宣教郎直祕閣而卒

孝宗時湯思退奏遣魏祀如金議和書稱姪大宋皇帝
某再拜奉于叔大金皇帝歲幣二十萬帝面諭祀曰今
遣使一正名二退師三減歲幣四不發歸附人祀條陳
十七事擬問對帝隨事畫可陞辭奏曰臣將旨出疆豈
敢不勉萬一無厭願速加兵帝善之兵部侍郎胡銓言
金不可和臣恐再拜不已必至稱臣稱臣不已必至請

降請降不已必至納土納土不已必至與觀與觀不已
必至如晉帝青衣行酒而後為快今日舉朝之士皆婦
人也不聽

金館伴張恭愈以國書稱大宋膺魏祀去大字祀拒之
具言天子神聖才傑奮起人人有敵愾意北朝用兵能
保必勝乎金君臣環聽拱竦金主許損歲幣不發歸正
人命元帥府罷兵分戍祀卒正敵國禮而還帝慰藉甚
厚先是王抃自金師還得二帥報書遂赦沿邊被兵州

軍詔畧曰此遣王抃遠抵潁濱得其要約尋澶淵盟誓之信倣大遼書題之儀正皇帝之稱為叔姪之國歲幣減十萬之數地界如紹興之時憐彼此之無辜約叛亡之不遣可使歸正之士咸起寧居之心洪适所草也論者謂前日之所貶損四方蓋未聞知今著之赦文失國體矣

寧宗時方信孺使金至濠州赫舍哩子仁止之于獄露刃環守之絕其薪水要以五事信孺曰反俘歸幣可也

縛送首謀自古無之稱藩割地則非臣子所敢言子仁怒曰若不望生還邪信孺曰吾將命出國門時已置生死度外矣子仁遣至汴見完顏宗浩出就傳舍宗浩使將命者來堅持五說信孺辨對不少屈宗浩不能詰授以報書曰和與戰俟再至決之信孺還朝廷以林拱辰為通謝使與信孺持國書誓草及許通謝百萬緡信孺至汴宗浩怒信孺不曲折建白遽以誓書來有誅戮禁錮之語信孺不為動將命者曰此非搗軍可了別出事

目以示之信孺曰歲幣不可再增故代以通謝錢今得此
求彼吾有隕首而已會興州遣師復大散關宗浩益疑
之乃遣信孺還復書于張巖曰若能稱臣即以江淮之
間取中為界欲世為子國即盡割大江為界且斬元謀
姦臣函首以獻及添歲幣五萬兩足犒師銀一千萬兩
方可議和好信孺還致其書韓侂胄問之信孺言敵所
欲者五事一割兩淮二增歲幣三索歸正人四犒軍銀
五不敢言侂胄固問之信孺徐曰欲得太師頭耳侂胄

大怒奪信孺三官臨江軍居住信孺三使金師
以口舌折強敵敵人計屈情見雖未即和然已
有成說及貶欲再遣使顧在廷無可者近臣以
王柟薦乃命假右司郎中持書北行柟倫之孫
也

元世祖時使梁曾等至安南其國有三門日蹲
欲迎詔自旁門入曾貽書責之往復者三卒從
中行且風之入朝日蹲不從遣其臣陶子奇偕

曾來貢曾進已與日躡辨論書帝大悅解衣賜之令坐地上右丞阿里意不然帝怒曰梁曾兩使外國以口舌息干戈爾何敢爾時有親王至自和林帝命酌酒先賜曾謂親王曰汝所辦者汝事梁曾所辦者吾與汝之事汝勿以為後也或讒曾受安南賂遺帝以問曾曾曰安南以黃金器幣奇物遺臣臣不受以屬陶子奇帝曰受之亦何不可

貢獻 三十則

漢文帝時有獻千里馬者帝曰鸞旗在前屬車在後吉
行日五十里師行三十里朕乘千里馬獨先安之於是
還其馬與道里費而下詔曰朕不受獻也其令四方毋
求來獻

光武帝詔曰郡國獻異味其令太官勿復受遠方口實
所以薦宗廟自如舊制時異國有獻名馬者日行千里
又進寶劍價直百金詔以劍賜騎士馬駕鼓車和帝時

嶺南舊獻生龍眼荔支十里一置五里一俟晝夜傳送
臨武長汝南唐羗上書曰臣聞上不以滋味為德下不
以貢膳為功伏見交趾七郡獻生龍眼等鳥驚風發南
州土地炎熱惡虫猛獸不絕于路至于觸犯死亡之害
死者不可復生來者猶可救也此二物升殿未必延年
益壽和帝下詔曰遠國珍羞本以薦奉宗廟苟有傷害
豈愛民之本其敕太官勿復受獻

順帝詔曰海內頗有災異朝廷修政太官減膳珍玩不

御而桂陽太守文贛不惟竭忠宣暢而遠獻大珠以求幸媚今封以還之

晉武帝時太醫司馬程據獻雉頭裘帝焚之于殿前敕內外敢有獻竒技異服者罪之

隋煬帝過鴈門太守丘和獻食甚精至馬邑太守楊廓獨無所獻煬帝不悅以和為博陵太守仍使廓至博陵觀和為式由是所至獻食競為豐侈

煬帝至江都江淮郡官謁見者專問禮餉豐薄豐則起

遷丞守薄則率從停解江都郡丞王世充獻銅鏡屏風
遷通守歷陽郡丞趙元楷獻異味遷江都郡丞由是郡
縣競務刻剝以充貢獻民外為盜賊所掠內為郡縣所
賦生計無遺加之饑饉無食民始采樹皮葉或擣棠為
末或煮土而食之諸物皆盡乃自相食而官食猶充物
吏皆畏法莫敢賑救王世充密為煬帝簡閱民間美女
獻之由是益有寵

唐太宗遣使至涼州都督李大亮有佳鷹使者諷大亮

使獻之大亮密表曰陛下久絕畋遊而使者求鷹若陛下之意深乖昔旨如其自擅乃是使非其人太宗謂侍臣曰李大亮可謂忠直手詔褒美賜以胡餅及荀悅漢紀

林邑獻五色鸚鵡新羅獻美女二人魏徵以為不宜受太宗喜曰林邑鸚鵡猶能自言苦寒思歸其國况二女遠別親戚乎并鸚鵡各付使者而歸

高宗時金紫光祿大夫劉祥道薨子齊賢嗣齊賢為人

方正高宗甚重之為晉州司馬將軍史興宗嘗從上獵苑中因言晉州產佳鷓劉齊賢今為司馬請使捕之工曰劉齊賢豈捕鷓者邪卿何以此待之

明皇車駕發泰山幸孔子宅致祭還至宋州宴從官于樓上刺史寇泚預馬酒酣明皇謂張說曰鄉者屢遣使臣分巡諸道察吏善惡今因封禪歷諸州乃知使臣負我多矣懷州刺史王丘餽牽之外一無他獻魏州刺史崔沔供張無錦繡示我以儉濟州刺史裴耀卿表數百

言莫非規諫且曰人或重擾則不足以告成朕常置之
坐隅且以戒左右如三人者不勞人以市恩真良吏矣
顧謂寇泚曰比亦屢有以酒饌不豐訴于朕者知卿不
借譽于左右也自舉酒賜之宰臣帥羣臣起賀樓上皆
稱萬歲由是以丘為尚書左丞汚為散騎侍郎耀卿為
定州刺史

明皇御五鳳樓酺宴時命三百里內刺史縣令各帥所
部音樂集于樓下各較勝負懷州刺史以車載樂工數

百皆衣文繡服箱之牛皆為虎豹犀象之狀魯山令元德秀惟遣樂工數人連袂歌于為明皇曰懷州之人其塗炭乎立以刺史為散官德秀性介潔質樸士大夫皆服其高

德宗時李正己畏上威名表獻錢三十萬緡德宗欲受之恐見欺却之則無辭崔祐甫請遣使慰勞淄青將士因以正己所獻錢賜之使將士人人戴工恩又諸道聞之知朝廷不重貨財德宗悅從之正己大慙服天下以

為太平之治庶幾可望焉

代宗之世每元日冬至端午生日州府于常賦之外競為貢獻貢獻多者則悅之武將姦吏緣此侵漁下民德宗生日四方貢獻皆不受李正己田悅各獻縑三萬匹德宗悉歸之度支以代租賦

德宗謂李泌曰每歲諸道貢獻共直錢五十萬緡今歲僅得三十萬緡言此誠知失體然宮中用度殊不足泌曰古者天子不私求財今請歲供宮中錢百萬緡願陞

下不受諸道貢獻及罷宣索必有所須請降敕折稅不使姦吏因緣誅剝德宗從之

澤州刺史李鷄上慶雲圖德宗曰朕以時和年豐為嘉祥以進賢顯忠為良瑞如卿雲靈芝珍禽奇獸怪草異木何益于人布告天下自今有此無得上獻

德宗以奉天窘乏故還宮以來尤專意聚斂藩鎮多以進奉市恩皆云稅外方圓亦云用度羨餘其實或割留常賦或增斂百姓或減刻吏祿或販鬻蔬果往往私自

入所進纔什一二李兼在江西有月進章梲在西川有日進其後常州刺史裴肅以進奉遷浙東觀察使刺史進奉自肅始及劉贇卒判官嚴綬掌留務竭府庫以進奉徵為刑部員外郎幕僚進奉自綬始

李錡既執天下利權以貢獻固主恩又以饋遺結權貴恃此驕縱無所忌憚盜取縣官財所部官屬無罪受戮者相繼浙西布衣崔善貞詣闕上封事言宮市進奉及鹽鐵之弊因言錡不法事德宗覽之不悅命械送錡錡

聞其將至先鑿院于道旁善員至并鎖械內院中生瘞之遠近聞之不寒而慄

憲宗時御史中丞盧坦奏彈前山南西道節度使柳晟前浙東觀察使閻濟美違赦進奉憲宗召坦褒慰之曰朕已釋其罪不可失信坦曰赦內宣布海內陛下大信也晟等不畏陛下法奈何存小信棄大信乎憲宗乃命歸所進于有司

淮南節度使王鏐入朝鏐家巨富厚進奉及賂宦官求

平章事翰林學士白居易上言以為宰相人臣極位非清望大功不應授昨除裴均外議已紛然今又除鶚則如鶚之輩皆生冀望若盡與之則典章大壞又不感恩不與則厚薄有殊或生怨望倖門一啓無可如何且鶚在鎮五年百計誅求貨財既足自入進奉若除宰相四方藩鎮皆謂鶚以進奉得之競為剗剝則百姓何以堪之事遂寢

山南東道節度使裴均恃有中人之助于德音後首進

銀器千五百餘兩翰林學士李絳白居易等上言均欲以此嘗陛下願却之憲宗遽命出銀器付度支既而有旨諭進奏院自今諸道進奉無得申御史臺有訪問者輒以名聞白居易復以為言憲宗不聽

宦官惡李絳在翰林以為戶部侍郎判本司憲宗問絳故事戶部侍郎皆進羨餘卿獨無進何也對曰守土之官厚斂于人以示私恩天下猶共非之况戶部所掌皆陛下府庫之物給納有籍安得羨餘若自左藏輸之內

藏以為進奉是猶東庫移之西庫臣不敢踵此弊也憲宗嘉其直益重之

國子祭酒孔戣為華州刺史明州歲貢蚶蛤淡菜水陸遞夫勞費戣奏疏罷之嶺南節度使崔詠堯宰相奏擬代詠者數人憲宗皆不用曰頃有諫進蚶蛤淡菜者為誰可求其人與之以戣為嶺南節度使

宣宗時右補闕內供奉張潛上疏以為藩府代移之際皆奏倉庫蓄積之數以羨餘多為課績朝廷亦因而甄

獎竊惟藩府財賦所出有常苟非賦歛過差及停廢將士減削衣糧則羨餘何從而致比來南方諸鎮數有不寧皆此故也一朝有變所蓄之財悉遭剽掠又發兵致討費用百倍然則朝廷竟何有利乞自今藩府長吏不增賦歛不減糧賜獨節遊宴省浮費能致羨餘者然後賞之宣宗嘉納之

後唐明宗將祀南郊遣客省使李仁矩以詔諭兩川令西川獻錢一百萬緡東川五十萬緡皆辭以軍用不足

西川獻五十萬緡東川獻十萬緡仁矩明宗在藩鎮時
客將也為安重誨所厚恃恩驕慢至梓州董璋置宴召
之日中不往方擁妓酣飲璋怒從卒徒執兵入驛立仁
矩于階下而詬之曰公但聞西川斬李客省謂我獨不
能邪仁矩流涕拜請僅而得免既而厚賂仁矩以謝之
仁矩還言璋不法未幾明宗復遣通事舍人李彥珣詣
東川入境夫小禮璋拘其從者彥珣奔還

前彰義節度使李金全屢獻馬明宗不受曰卿在鎮為

治何如勿但以獻馬為事


後周歸德節度使常思入朝從平盧節度使將行奏曰
臣在宋州舉絲四萬餘兩在民間謹以上進請徵之太
祖頷之敕榜宋州凡常思所舉絲悉蠲之已輸者復歸
之思亦無怍色

金尚書省奏汾陽節度副使牛信昌生日受饋獻法當
奪官金主曰朝廷行事苟不自正何以正天下尚書省
樞密院生日節辰饋獻不少此而不問小官饋獻即加

按劾豈正天下之道自今宰執樞密饋獻亦宜罷去
高麗遣使謝金不納叛金有司奏高麗所進玉帶乃石
似玉者金主曰小國無能辨識誤以為玉耳且人不易
物惟德其物若復却之豈禮體也

元成宗時西域賈人有獻珍寶求售者議以六十萬錠
酌其直省臣有謂左丞尚文者曰此所謂押忽大珠也
六十萬錠之不為過矣文問何所用之答曰含之可不
渴熱面可使目有光文曰一人含之千萬人不渴則誠

寶也若一寶止濟一人則用已微矣吾之所謂寶者米粟是也有之則百姓安無則天下亂以功用較之豈不愈于彼乎



經濟類編卷四十三